

767480

臺灣文獻史料叢刊

第六輯

閩海閩海

上海紀

見

紀聞 輯紀

要錄略要

(合訂本)




石景宜 贈書
石漢基



Y112/15

臺灣大通書局印行



21113001124575

臺灣文獻叢刊第二二種

海紀輯要

夏

琳

弁言

海紀輯要的原抄本現存中央研究院歷史語言研究所。去年，我們傳抄一冊，準備作爲臺灣文獻叢刊第一種排印；後來，爲了取得該所的同意，所以延擱下來。去年十二月，該所來函同意，我們才開始標點、發排。其間，臺南市文獻委員會已經傳抄排印出版（見「臺南文化」第五卷第四期）。本書的校對，因原抄本不在手頭，即以「傳抄本」與「臺南本」參考爲之。姑舉兩例。（一）篇名，傳抄本僅作「海紀輯要」，臺南本則有「卷之一、卷二、卷三」字樣，我們改作「卷一、卷二、卷三」。（二）作者，傳抄本或作「泉南夏琳元斌甫纂」（卷一），或作「泉南夏琳元斌纂」（卷二、卷三）；臺南本則僅「卷一」有「泉南夏琳元斌甫撰」字樣；我們三卷統改爲「泉南夏琳元斌纂」。這樣處理，如由校勘學的眼光看來，是不甚妥當的；但是，我們現在祇能這樣做；我們但求「實質的意義」沒有錯誤。我們引爲惶惑的，是由同一抄本傳抄的兩本抄本，何以竟有如上所述的距離？這是一可注意的問題。

周憲文於臺北惜餘書室

海紀輯要卷一

泉南夏琳元斌纂

乙酉、隆武元年 夏、閏六月，唐王聿鍵卽皇帝位於福州。

初，唐王統兵勤王，以擅離南陽，錮禁獄。及弘光立，赦出，而南都破；靖魯伯鄭鴻達遇於嘉興，語合，遂奉以入閩，與其兄南安伯芝龍謀立之，於閏六月十五日卽位。改福州爲天興府、布政司爲大內，改元隆武。

晋南安伯鄭芝龍平國公、靖魯伯鄭鴻達定國公。

芝龍字飛黃，南安石井人。兄弟四：長芝龍，次芝虎，三鴻達，四芝豹。芝龍起家海上，崇禎戊辰歸誠。以平海寇功，累遷至南澳總兵。甲申之變，弘光主卽位南京，封南安伯。至是，以翊立功，晋芝龍平國公、鴻達定國公、芝豹澄濟伯。召見平國公鄭芝龍子成功，賜姓朱，封忠孝伯。

成功原名森，字大木；以天啓甲子年七月十五日生於日本。誕時萬火齊明，風儀秀整。七歲取回，儼儼有大志。年十五，補南安弟子員；試高等，食餼。赴省試，有金陵術士相之，驚曰：『君非科甲中人，殆王侯相也！』時方銳志場屋，不以爲然。及隆武立，召見；奇其狀貌，封忠孝伯；撫其背曰：『惜無一女配卿，卿當

盡忠吾家，無相忘也！」因賜姓朱，改名成功。自是，中外稱國姓云。

封平國公部將洪旭爲忠振伯、張進忠匡伯、林習山忠定伯、陳輝忠靖伯。

尋封施天福爲武毅伯（芝龍部將）、陳豹忠勇侯、林察輔明侯（鴻達部將）。

以鄭鴻達爲大元帥，出浙東；鄭彩爲副元帥，出江西。

二將旣出關，疏言餉缺，逗遛不前。

丙戌、二年 春、正月，以忠孝伯成功爲御營都督，賜尙方劍，儀同駙馬；尋命佩招討大將軍印，鎮仙霞關。

時軍國重事皆取決於芝龍；帝積不能平，常獨居愁嘆。成功進見，奏曰：『陛下鬱鬱不樂，得無以臣父有異志耶！臣受國厚恩，義無反顧，誓當以死報陛下！』帝嘉嘆，故有是命。

秋、八月，鄭芝龍密撤回仙霞兵，縱清師入閩。

芝龍以擁立非其本意，日與文臣忤。又度清朝神武，必不能偏安一隅，有叛意；密遣人通清內院洪承疇、御史黃熙胤。至是，聞魯監國杭州失守，乃稱缺餉，檄守將施天福等同。

忠孝伯成功兵潰於仙霞關。

芝龍聞清師將至，密遣親吏到清帥軍前送降款；且授意於成功，令引兵還。親

吏先密到清帥納款，清帥詰之曰：『吾兵未臨境，而先獻降書，豈非詐耶？』命縛出斬之；親吏呼冤，乃遣之回。至仙霞，入見成功，將以此告；語未發，成功曰：『歸語太師，速發餉濟師！吾妻妾簪珥，皆脫以供軍需』。因引入臥內，見夫人等皆布絹竹釵；噤不敢發一語。既出，語所私曰：『向若道及納款事，吾頭已斷矣！』因疾回，見芝龍，備述前事；芝龍曰：『癡兒固執乃爾，吾不發糧，彼能枵腹出戰哉！』成功屢請，皆不報。關兵無糧，遂逃散；成功不得已引還。至延平，登城周視，嘆息而回。

秋、九月，帝下詔親征。師次延平，清兵猝至；帝出奔，殂於將樂。

初，帝決意親征；於南臺祭江，忽風雨驟至，旗幟盡拔，不能成禮。成功跪榻前，泣奏曰：『臣父已有異志，陛下當善自爲計！』因伏地嗚咽。帝掩袂揮淚，命之起；遂向延平。將幸贛，清兵猝至，迫城；帝倉皇出奔將樂，清兵追及，遂遇害（或云投井死、或云死于亂軍）。

清貝勒王入閩，鄭芝龍退保安平鎮，尋降；忠孝伯成功遁入海。

清兵至泉州，芝龍退保安平，軍容甚盛；以洪、黃之信未通，未敢迎師。貝勒以書招之，其略曰：『吾所以重將軍者，正以將軍能立唐藩也。人臣事主，苟有可爲，必竭其力；力不勝天，則投明而事，乘時建不世之功，此豪傑事也。若將軍不

輔立，吾何用將軍哉！且兩廣未平，今鑄閩粵總督印以相待！芝龍得書大喜，成
功力諫不聽，遂降。十一月，將往福州見貝勒，成功又泣諫；知不可挽，乃遁入海。
芝龍至福州，貝勒置酒，甚懽；忽夜半挾之北去，從者皆不得見。

丁亥、永曆元年 永明王由榔卽皇帝位於肇慶。

王爲神宗之孫、桂王之子，初封衡陽，以寇亂徙梧州。會桂王薨，兩廣總督丁
魁楚與廣西巡撫瞿式耜擁立之；改元永曆，以肇慶府署爲行宮。

明忠孝伯招討大將軍成功起兵。

初，芝龍旣歸清，諭成功速降；成功泣曰：『父教子忠，不聞以貳！』卽逸
去。及芝龍北去，乃與所厚數十人舉義，收兵南澳。時年二十四，文移稱「招討大
將軍罪臣國姓」。旣聞永曆卽位，遣人間道上表，尊奉正朔。
大將軍成功屯兵於鼓浪嶼。

時廈門先爲建國公鄭彩及弟定遠侯鄭聯所據。賜姓自南澳回，舊衆稍集，乃移
屯鼓浪嶼。以洪政、陳輝爲左右先鋒，楊才、張進爲親丁鎮，郭泰（或作郭新）、余
寬爲左右鎮，林習山爲樓船鎮，進攻海澄。清援兵至，洪政中流矢死，乃引還。
秋、八月，大將軍會定國公鴻達攻泉州。

鴻達自芝龍歸清，尙擁兵甲。至是，賜姓與合攻泉州，敗清提督趙國祚於桃花

城。

山，追至城下。九月三日攻城，軍聲大振；清漳州副將王進率兵來援，圍解。

戊子、二年 永曆在桂林。

春、閏三月，大將軍攻同安，克之；以葉翼雲知縣事。

賜姓引兵取同安，戰於店頭山，清兵潰；追至城下，守將廉郎、知縣張効齡棄城遁。賜姓入據之，以葉翼雲知縣事（翼雲，廈門人，庚辰進士，由吳江知縣擢吏部主事）。

秋、八月，清兵破同安，知縣葉翼雲、教諭陳鼎、守將丘晉、林壯猷皆死之；屠其泉州之圍，自冬徂春；郡邑戒嚴，所在蜂起。七月十三日，清部堂陳錦援師至。八月，遂陷同安；丘晉、林壯猷戰沒，翼雲及鼎死之。屠戮無遺，凡五萬餘人。先是，有「同安血流溝」之讖；至是，果驗。是歲大饑，斗米千錢。

己丑、三年 永曆在肇慶。

春、三月，大將軍攻漳浦，克之。

自同安敗後，賜姓往銅山募兵，命柯宸樞、黃廷等攻漳浦，守將王起倬降；遂由雲霄抵詔安，移屯分水關，令黃廷、柯宸樞守盤陀嶺。

清兵攻盤陀，中衝鎮柯宸樞死之。

清漳鎮王邦俊與副將王之剛合兵來攻，廷不戰而遁；宸樞分兵拒戰，衆寡不敵，與其弟中軍宸梅俱戰死。賜姓哀悼，厚恤其家，建祠祀之。

秋、七月，永曆遣使晉招討大將軍忠孝伯成功爲延平公。

冬、十一月，大將軍徇潮州。

是年，全粵俱奉永曆正朔，土寇隨在竊據。守潮者，永曆新泰侯郝尙久也；自鴻達據潮之揭陽，兩家各相疑忌。初，潮人黃海如、陳斌爲巨寇，來歸；至是，導賜姓入潮，遂入南陽。分兵勦許隆、楊廣諸賊及達濠、新墟等寨，悉平之（是時尙久已有貳心，故與鴻達兩相猜疑）。

命太子太師鄭香守石尾城。

有衆數千。後爲清兵所破，二子鄭廣、鄭海死焉。

庚寅、四年 永曆在肇慶。

春、正月，大將軍入潮陽。

賜姓引兵將至潮陽，知縣常翼風以城降；令洪旭駐鎮其地。

六月，攻潮州，不克。

遣甘輝殺賊黃亮采，復敗廣東邵提督軍於潮陽。

秋、八月，大將軍旋師廈門，併定遠侯鄭聯軍。

時金、厦兩島尙爲建國公鄭彩、定遠侯鄭聯所據，肆虐不道，民不堪命；其將章雲飛尤橫。賜姓乃與陳豹等議曰：『兩島本吾家土地，彼兄弟虎踞橫行，大不堪』！乃嚴部署，自揭陽回軍，於中秋夜抵厦門。聯方醉萬石巖，報至，不得通；詰朝出見賜姓舟中，交拜甚歡。賜姓笑曰：『兄能以一軍相假乎？』聯未及對，諸執銳者前矣；唯唯惟命。於是麾軍過船，聯衆皆降，海上軍悉屬焉。惟彩率所部遁去；飄泊數載，賜姓招之還，以病卒於家。

冬、十一月，大將軍南下，命鄭芝鵬鎮守厦門。

賜姓至潮陽，提塘黃文自行在來，稱有旨徵賜姓率兵入援。永曆在南寧。

招討大將軍延平公成功起兵勤王。

時清平南王尙可喜、靖南王耿繼茂率滿騎數萬攻復廣州，西寧王李定國望賜姓入援甚切。閏十一月，賜姓率各鎮官兵南下勤王；十二月，抵揭陽。

辛卯、五年 春、正月，大將軍成功率勤王兵至南澳。

施琅進曰：『勤王固臣子職分；但琅昨得一夢，甚不利。乞復細思』！賜姓默然，令將琅所佩左先鋒印及兵將委副將蘇茂管轄，命琅同定國公鴻逵回厦門助芝鵬固守；賜姓率師南下。二月，至白沙湖，颶風大作，船幾覆。三月，至大星所，殺

退惠州援兵；攻其城，下之。

二月，清巡撫張學聖會提督馬得功襲廈門，文淵閣大學士吏部尚書曾櫻死之。

賜姓南下，舟次平海衛；學聖、得功乘虛來襲。時鴻達棄揭陽回師未至，芝鵬不能守；得功先遣數十騎渡五通登岸，兵民望見，皆潰。時閣部曾櫻在城中，或邀之遁；櫻曰：『此一塊清淨土，正吾死所，豈復泛海求活耶！』遂自經；時爲二月三十日。門人阮旻錫、陳泰冒險出其屍，鄉紳王忠孝殮之，殯於金門。奏聞永曆行在，追贈光祿大夫上柱國太師，諡文忠，賜祭葬；蔭一子中書科舍人、一子錦衣衛，世襲。

夏、四月，大將軍旋師復廈門，承制誅鄭芝鵬。

先是，馬得功既入島，張學聖及興泉道黃澍於三月初一至；見廈門孤懸海外，汪洋萬頃，愕然曰：『此絕地也！若有緩急，援兵豈能飛渡耶？』即先引回。不數日，鴻達至，截港圍攻。得功欲退，不得渡，窘甚；謂鴻達曰：『公等家口皆在安平，脫得功不出，恐不利公家！』鴻達患之，且不虞賜姓之猝至也，縱其歸。四月初一，賜姓旋師，得功已渡海二日矣。賜姓大悔恨，按芝鵬失守罪，請尙方劍斬以徇；諸將股慄，兵勢復振，凡六萬餘人。鴻達退泊白沙，築寨居之。

左先鋒施琅得罪逃歸清。

琅，晉江人。其事賜姓也，年最少，知兵善戰；自樓櫓、陣伍、旗幟之法，皆琅啓之。前在南澳兵付蘇茂代將，意同日必復任。賜姓既不與，遂請爲僧；賜姓令再募兵，許授前鋒鎮。偶有親丁曾德逃於賜姓營，琅擒治之，賜姓馳令勿殺，琅竟殺之；賜姓大怒，捕琅并逮其家屬。琅乘間逸去，密渡安平，依鄭芝豹；賜姓收其父大宣并其弟援勦左鎮施顯，殺之。

五月，大將軍入南溪。

賜姓自回廈門，申嚴紀律，軍聲大振。率衆入漳之南溪，漳鎮王邦俊迎戰，大破之；復敗之於漳浦，降其將卒數百人，漳州戒嚴。

冬、十一月，大將軍敗清提督楊名高於小盈嶺。

名高自福州率步騎援漳，賜姓迎戰小盈嶺；名高大敗，僅以身免。乘勝徇漳浦，守將陳堯策以城降。

前定西侯張名振、平夷侯周崔之等來歸。

名振、崔之，魯監國之別將。至是，與英義伯阮駿等自舟山來歸，俱授爲水師鎮。

壬辰、六年 春、正月，大將軍攻海澄；清守將郝文興以城降。

賜姓引兵向海澄。是日，潮乍漲，舟達城垣，守將郝文興降；以舉人黃維璟、

馮澄世先後知縣事。

三月，大將軍大敗清總督陳錦於江東橋；乘勝拔長泰，漳州屬邑俱下。

賜姓遣中提督甘輝攻長泰，遇清副將王進（號老虎）於北溪。兩人俱雄健著名，久念一決雌雄；乃奮戈傳矢，兩馬相當。自己至午，縱橫跌蕩，觀者竦踊。既而兩家兵至，乃解。進入長泰，輝日夜攻，弗克。清總督陳錦來援，賜姓簡精銳逆戰於江東橋北。錦徂先年同安之捷，頗輕敵；全軍俱覆，奔回泉州。乘勝攻長泰，拔之；王進獨以數十騎遁入漳州城，屬邑俱下。

夏、四月，大將軍攻漳州。

賜姓引兵圍漳州。五月，清浙鎮馬逢知（原名進寶）率兵來援，縱其入城；引兵出戰，連敗之，遂嬰城固守不出。賜姓累攻不下，乃壅鎮門之水以灌之，堤壞不浸；復列柵圍之。城中食盡，人相食，枕藉死者七十餘萬人。

秋、七月，清庫成棟弑其主總督部院陳錦來歸，誅之。

錦軍於鳳尾山，慙於江東之敗，號令峻刻；爲其僕庫成棟所刺，持首來歸。賜姓嘆曰：『僕隸之人而弑其主，是大逆也；大逆何以勸後！』命斬以徇。成棟呼曰：『陳錦暴戾不仁，衆心已離；寬我一死，必有望風續至者，八閩可不勞而定也！』衆咸爲之請；賜姓曰『得八閩者，一時之私利也；誅叛逆者，萬世之公義也。吾

終不忍以一時之私利而廢萬世之公義！命亟斬之。

冬、十月，戰於古縣，敗績；解漳州圍，退守海澄。

漳州久圍，中外隔絕。清固山金礪來援；時賜姓久頓堅城，師老糧匱，退屯古縣；迎戰累敗，收兵退保海澄。

永曆在安隆。

是時，封李定國爲西寧王；敗清定南王孔有德於桂林、敬謹王尼堪於衡州。

癸巳、七年 春、正月，大將軍遣定西侯張名振率水師恢復浙直州縣。

夏、五月，清固山金礪攻海澄，大將軍親督兵擊却之。

金礪既解漳圍，悉滿、漢精銳進攻海澄。城壞百餘丈，賜姓親立雉堞防禦；張蓋而坐，與諸將飲敵樓。清兵望見，矢礮雨集；賜姓益治軍，指揮自若。方易坐，而原座爲礮擊碎；賜姓大呼曰：『天祐孤臣，諸將無虞也！』衆各奮氣十倍。清師臨城，蜂擁而上；有斲養卒鄭仁舉巨斧以砍，衆從之，登者悉墜，積屍填壕。甘輝復率兵截擊，擒斬無遺；固山宵遁。是役也，論功行賞，以忠孝伯印授甘輝，輝不敢受；召鄭仁，拜都督。乃更築短城，而澄守益固。

永曆遣兵部主事萬年英齋勅晉成功漳國公，封延平王；成功表辭。

成功既破固山金礪，遣監督池士紳以蠟表奏永曆行在，并叙破提督楊名高及殲

總督陳錦之功。永曆乃命年英齋勅晉成功漳國公，封延平王；成功拜表辭讓，請甘輝、黃廷等各鎮封爵。

秋、九月，大將軍率師南下勦鷓汀貝；尋引還。

清兵攻潮州，郝尙久乞援；遣陳六御先率兵救之，尙久不敢納。潮破，尙久自焚死。賜姓尋破鷓汀貝土賊而還。初，鷓汀貝恃其土城險固，聚衆剽掠，海上商船多被擒截；抽腸剖腹，慘酷非常。至是，攻破之，屠其城，丁壯無遺。

甲午、八年 春、二月，清遣官來議撫，以海澄公印封大將軍；弗受。

初，芝龍在京密令李德回勸賜姓就撫，陽許之；清遂封芝龍爲同安侯、芝豹左都督，遣鄭、賈二官實詔及海澄公印勅授賜姓，且封鴻逵奉化伯。賜姓不受。十月，再遣內院學士葉成格、理藩院阿山及鄭度（芝龍少子）實勅至，許以漳、泉、惠、潮四府安插兵衆；賜姓堅執不從。李德泣請曰：『將軍弗聽，恐太師（卽芝龍）禍且不測！』賜姓戚然久之；謂曰：『非不知清朝待我厚，但我受明室厚恩，義不可屈。』因泣；揮之去。葉、阿回奏，清朝怒置芝龍於高牆、戍芝豹寧古塔。

冬、十月，大將軍成功遣兵勤王。

遣輔明侯林察、閩安侯周瑞督水師，戎旗鎮王秀奇、左先鋒蘇茂督陸師，率官兵戰艦百餘艘南下勤王。差効用官林濬奉勤王表詣永曆行在，并持書會西寧王李定

國。

十二月，大將軍復漳州。

十二月晦日，賜姓自廈門入海澄。夜嚴部署，四鼓直抵漳州；入其城，兵不血刃。於是，守將卜世用、魏標等及知府房星燦、知縣周瓊皆降；十縣俱下。泉州屬邑望風而潰，獨泉帥韓尙亮固守泉州不下。

乙未、九年 春、二月，招討大將軍延平王成功承制設六官。

初，賜姓以永曆行在遙隔，軍前所委任文武職銜一時不及奏聞，永曆許其便宜委用：武職許委至一品、文銜許設六部主事。賜姓復疏請，以主事七品銜卑，難以彈壓；永曆乃賜詔許其軍前所設六部主事秩比行在侍郎、都事秩比郎中、都吏秩比員外。於是設六官：以潘賡鍾（壬午舉人）爲吏官、洪旭爲戶官、陳寶鏞爲禮官、張光啓爲兵官、程璠爲刑官、馮澄世爲工官，設協理各一員、左右都事各二員。以常壽寧爲察言司，鄧會、張一彬爲正副審理（寶鏞、澄世，俱丙戌舉人）。設儲賢館。

以前所試諸生洪初闢、楊芳、呂弼、林復明、阮旻錫等充之。先是，永曆開科粵西，諸生願赴科舉者，賜姓皆給花紅、路費遣之。島上衣冠濟濟，猶有昇平氣象。

設育胃館。

以死事諸將及侯伯子弟柯平、林維榮等充之。

改中左所爲思明州。

中左所，卽廈門城。至是，改稱思明州；以薛聯桂、鄧會先後知州事。

奉魯王居金門。

時監國魯王及寧靖王諸宗室避難至廈門，賜姓皆禮贍優給，奉之居金門。

給避難給紳盧若騰、王忠孝、辜朝薦、徐孚遠等銀幣。

時縉紳避難入島者甚衆，賜姓皆優贍之；歲有常給，待以客禮，軍國大事時輒咨之，皆稱爲老先生而不名。若盧、王、辜、徐及沈佺期、郭貞一、紀許國諸公，尤所尊敬者。

誅餉鎮黃愷。

賜姓自興名以來，軍律嚴明，禁止淫掠；犯者立斬。破城之日，諸軍雖爭取財物，遇婦人在室，則却退不敢入，遠近稱爲三代之師。以餉餽不足，命愷爲餉鎮，供給軍需。愷剋剝不堪，怨聲載道；賜姓怒，收斬之。

夏、五月，總督勦王師林察、周瑞、王秀奇、蘇茂等無功引還；大將軍怒，貶責有

差。